

## Mid-Day Dogri News Bulletin, 21<sup>st</sup> March 2025

समे – 12:25

<><><><><><>

### LG-Lucknow

उपराज्यपाल मनोज सिन्हा होरें आखेआ ऐ जे कताबां ओह अंतर-शक्ति न जेड़ियां ज्ञान ते बुद्धी आली भेठा रोशनी दस्सने दा कम्म करदियां न। लेखक अपने शब्दें कन्नै असेंगी सोचने ते साढ़े नजरियै गी होर व्यापक बनाने दा कम्म करदे न। इयै चीजां असेंगी अपने अंदर झांकने दा मौका उपलब्ध करोआदियां न। एह गल्ल उपराज्यपाल होरें लखनऊ च मन्ने परमन्ने दे लेखक श्री लाल शुक्ला हुंदे जन्म शताब्दी समारोह गी संबोधत करदे होई आक्खी। शुक्ला होरें गी श्रद्धांजलि भेंट करदे होई उपराज्यपाल होरें हुंदे जीवन पर लोह पाई ते उंदे कम्में गी उजागर कीता। उनें आखेआ जे शुक्ला होरें गी ग्रामीण भारत ते सियासी मसलें दी गूढ समझ ही। श्री लाल शुक्ला हुंदे चेते च इक प्रदर्शनी दा बी उपराज्यपाल होरें उद्घाटन कीता।

<><><><><><>

### CM-Vacancies

मुख्यमंत्री उमर अब्दुल्ला होरें विधानसभा गी जानकारी दित्ती ऐ जे इस ब'रे दे चीरै तगर 7 जहार 253 असामिएं गी पूर करने दी योजना बनाई गई ऐ, इंदे च गजटिड ते नॉन गजटिड असामियां शामिल न। आकाशवाणी दे जम्मू संवाददाता दी रिपोर्ट मूजब पिछले 2 ब'रें च 11 जहार 526 गी इनें श्रेणिएं तैहत लाया गेआ ऐ। मुख्यमंत्री जिंदे कश आम प्रशासनिक मैहकमे दा प्रभार बी ऐ, होरें जानकारी दित्ती जे इस ब'रे इक जहार 502 गजटिड ते 5 जहार 751 नॉन गजटिड असामिएं गी पूर करने दा लक्ष्य रखेआ गेआ ऐ। एमएलए सतीश कुमार शर्मा हुंदे आस्सेआ पुच्छे गेदे सुआले दे परते च उनें एह जानकारी दित्ती। शर्मा होरें आखेआ जे कुल 32 जहार 474 असामियां 31 जनवरी 2025 तगर 38 सरकारी मैहकमे च खाली पेदियां हियां। जिंदे च 2 जहार 503 गजटिड, 19 जहार 214 नॉन गजटिड ते 10 जहार 757 एमटीएस श्रेणी तैहत न।

<><><><><><>

## Satish Printing Centre

यातायात मंत्री सतीश शर्मा होरें कल जम्मू च ट्रांसपोर्ट कमीशनर दे दफ्तर व केन्द्रीय ड्राइविंग लाइसेंस ते पंजीकरण प्रमाण पत्र सरबन्धी प्रिंटिंग सेंटर डीएलएस ते आरसीएस दा उद्घाटन कीता। इस दरान मंत्री होरें गलाया जे सब्बै बकाया ड्राइविंग लाइसेंसें गी 90 दिनें दे अंदर मुकम्मल करी दित्ता जाग। उनें मोटर गडिडएं सरबन्धी विभाग दी बी सराहना कीती जेह्डी लोके दिएं समस्याएं गी समें उप्पर हल करने दे लोडचदी गैह् पुट्ठा'रदा ऐ। मंत्री होरें मोटर गडिडएं सरबन्धी विभाग आस्सेआ परानी प्रदूषण फैलाने आली असें मैटाडोरें गी बदलने लेई 5 लख रुपे दी सब्सिडी प्रदान करने दा बी जिक्र कीता।

<><><><><><>

## Div.Com-Smart City

जम्मू दे डिवीजनल कमीशनर ते जम्मू स्मार्ट सिटी लिमिटेड दे अध्यक्ष रमेश कुमार होरें जम्मू स्मार्ट सिटी लिमिटेड आस्सेआ तोड़ चाढ़े जा'रदे बक्ख-बक्ख प्रोजेक्ट दी अमलावरी दा बैठक दरान जायजा लैता। बैठक च जम्मू स्मार्ट सिटी लिमिटेड दे मुख कारजकारी अधिकारी ते होर दुए अफसर सनें सरबन्धी मैहकमे दे अफसरें एसएसपी ट्रैफिक होर शामिल होए। इस दरान हर इक कम्में दी ठोस ते माली प्रगति दा जायजा लैता। इस दरान सरबन्धी अधिकारिणें स्मार्ट सिटी अरबन मोबिलिटी बजारें आले थाहरे गी खूबसूरत बनाने, ग्रीन स्पेसें, आपदा प्रबंधन ते आईटी जतनें बारे व्यापक पावर पोआइंट प्रेसन्टेशन दित्ती। डिवीजनल कमीशनर होरें विकास कम्में दे म्यार मजूदा स्थिति कारवाइएं ते रक्ख रखाव बारे जानकारी हासल कीती।

<><><><><><>

## Reasi

रियासी दियां डिप्टी कमीशनर निधि मलिक होरें पंजीकृत निर्माता कम्में आले लोके दे बच्चे लेई 92 लख 16 ज्हार 524 दी माली सहायता जारी कीती। एह माली सहायता निर्माण ते होर दुए निर्माण कम्में कन्नै जुड़े दे कम्पगारें दे कल्याण सरबन्धी बोर्ड तैह्त दित्ती गई ऐ। डिप्टी कमीशनर होरें श्रम मैहकमे दे जतनें दी सराहनाकीती। उनें इस गल्ला पर जोर पाया जे सरकार दी कल्याणकारी स्कीम च लाह् बद्धोबद्ध लाभार्थिणें तगर पुजना लोडचदा।

<><><><><><>

## PFRDA

पेंशन निधि विनियामक ते विकास प्राधिकरण – पीएफआरडीए नै संगठित पेंशन योजना-यूपीएस दी अमल-आवरी लेई अधिसूचना जारी करी दित्ती ऐ। एह्दे शा पैहले केंद्र सरकार दे राश्ट्री पेंशन प्रणाली-एनपीएस दे तैहत्त औने आहले कर्मचारियें लेई इस ब'रे जनवरी म्हीने अधिसूचना जारी कीती गई ही। पीएफआरडीए नै आखेआ ऐ जे संगठित पेंशन योजना कन्नै सरबंघत नियम अगले म्हीने दी पैहली तरीक थमा लागू होडन। एह् नियम त्रै श्रेणियें दे केंद्र सरकार दे कर्मचारियें दे नामांकन च प्रभावी होडन। एह्दे च पैहली अप्रैल 2025 तकर सेवारत केंद्र सरकार दे एनपीएस कर्मचारी, केंद्र सरकार दी सेवा च पैहली अप्रैल 2025 यां ओह्दे परैन्त भर्ती होने आहले कर्मचारी ते एनपीएस दे तैहत्त 31 मार्च 2025 गी यां ओह्दे शा पैहले सेवानिवृत्त होई चुके दे जां अपनी मर्जी कन्नै सेवानिवृत्ति लेई चुके दे यां नियम 56(जे) दे तैहत्त सेवामुक्त करी दित्ते गेदे कर्मचारी शामिल न। केंद्र सरकार दे इ'नें सभ्मनें श्रेणियें दे कर्मचारियें लेई नामांकन ते दावा फॉर्म पैहली अप्रैल थमां प्रोटीन सीआरए दी वेबसाइट – [npscra.nsdl.co.in](http://npscra.nsdl.co.in) पर ऑनलाइन उपलब्ध होडन। कर्मचारी फॉर्म गी दस्ती बी जमा करोआई सकदे न।

<><><><><><>

## PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह् 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एह्दे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह् कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एह्दे कन्नो कन्नी एह्दा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एह्दा डोगरी च अनुवाद प्रसारत कीता जाग। एह्दा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>